

18 JUN 2003

Umno-Rafidah (Timbalan)

SAYA TAK PERNAH TERFIKIR JADI TIMBALAN PRESIDEN - RAFIDAH

KUALA LUMPUR, 18 Jun (Bernama) -- Ketua Wanita Umno Datuk Seri Rafidah Aziz berkata beliau tidak pernah terfikir untuk memegang jawatan Timbalan Presiden Umno, yang pada tradisinya turut dilantik sebagai Timbalan Perdana Menteri.

"Sesiapa tuhan restui, dengan izin Allah terbuka pintu hati Datuk Seri Abdullah Ahmad Badawi memilih beliau, maka kita orang Umno, pemimpin ke, ahli ke, akur pada tradisi," katanya pada persidangan berita di sini, hari ini.

Rafidah yang juga Menteri Perdagangan Antarabangsa dan Industri, antara pemimpin kanan dalam kabinet kerajaan, ketika ditanya mengenai kemungkinan beliau dilantik menjawat jawatan nombor dua negara itu, berkata;"Ooo..mak oii ...tak pernah terfikir setakat itu."

Abdullah telah dinamakan sebagai pengganti kepada Perdana Menteri Datuk Seri Dr Mahathir Mohamad yang akan bersara Oktober ini.

Rafidah berkata pada tradisinya presiden Umno memegang jawatan perdana menteri dan begitu juga penjawat jawatan timbalan perdana menteri adalah juga timbalan presiden Umno.

Justeru itu beliau berpendapat, sesiapa yang dipilih oleh Abdullah kelak sebagai timbalannya nanti diberi "laluhan tanpa halangan" untuk menjawat jawatan timbalan presiden Umno.

"Berilah kekosongan kerusi timbalan presiden itu kepada orang yang dipilih (sebagai timbalan perdana menteri) supaya Umno tetap tunjang kerajaan, supaya Presiden Umno adalah Perdana Menteri, dan timbalan presiden adalah timbalan perdana menteri.

"Maka begitulah Umno jadi tulang belakang kerajaan, barulah kita megah kata Umno mendokong kerajaan," katanya.

Rafidah berkata sebarang spekulasi atau perhitungan berhubung siapa bakal dilantik timbalan perdana menteri hanya akan menjejaskan mereka yang dikaitkan.

"Kalau ada orang nak bertanding, itu hanya nak memenuhi nafsu sendiri, itu bererti (mereka) tidak langsung memikirkan kepimpinan parti.

"Akhirnya Allah akan tentukan, ini penting kita ingat. Kalau kita lari dari hakikat itu, maka kita pandai-pandai buat perhitungan, buat spekulasi yang akhirnya merosakkan orang sekeliling," katanya.

-- BERNAMA

MS ZS RON